

Statuti i Federatës Shqiptare të Notit

Hyrje

Ky statut është dokumenti themelor mbi bazën e të cilit do të drejtohet Federata Shqiptare e Notit

Federata Shqiptare e Notit, është person juridik, shoqatë, regjistruar në Gjykatën e Rrethit Gjyqësor Tiranë sipas Vendimit Numër 2491, të datës 04/03/2009

Ky statut është miratuar për here të parë nga Asambleja e Përgjithshme e Federatës Shqiptare të Notit, në mbledhjen e datës 18/03/2018.

Ndryshimet dhe shtesat në këtë Statut janë miratuar nga Asambleja e Përgjithshme e Federatës Shqiptare të Notit, në mbledhjen e datës 28/02/2024

KREU I

PARIME TË PËRGJITHSHME

Neni 1

Emri, forma dhe adresa

1. Federata Shqiptare e Notit përfaqëson bashkimin vullnetar të shoqatave sportive, shoqërive sportive dhe klubeve sportive të sportit të notit në Republikën e Shqipërisë.
2. Federata Shqiptare e Notit vepron në përputhje me dispozitat e ligjit nr. 79/2017, datë 2.04.2017 “Për Sportin” i ndryshuar, ligjin nr. 7850, datë 29.7.1994 “Kodin Civil i Republikës së Shqipërisë”, i ndryshuar, ligjin nr. 8788, datë 07.05.2001 “Për Organizatat Jofitimprurëse” i ndryshuar, ligjit nr. 80/2021 “Për regjistrimin e organizatave jofitimprurëse” i ndryshuar, si dhe akte të tjera ligjore dhe nënligjore që rregullojnë këto aktivitete dhe që janë në fuqi në Republikën e Shqipërisë.
3. Federata Shqiptare e Notit, përdor shkurtimin zyrtar FSHN
4. Pasuria, të ardhurat dhe fitimet e FSHN-së do të përdoren për të mbështetur qëllimet jofitimprurëse të FSHN-së dhe nuk do të përdoren për të krijuar përfitime të veçanta individuale, qoftë në mënyrë të drejtëpërdrejtë apo tërthorazi për asnjërin nga themeluesit, drejtorin, nëpunësit, ndonjë anëtar të shoqatës, ndonjë të punësuar apo donator të OJQ-së.
5. Organizata mund të angazhohet në aktivitete ekonomike me qëllim të mbështetjes së aktiviteteve të saja jofitimprurëse, në pajtim me ligjin nr. 8788, datë 07.05.2001 “Për Organizatat Jofitimprurëse”, i ndryshuar, me kusht që të ardhurat e realizuara nëpërmjet të aktiviteteve ekonomike të shfrytëzohen ekskluzivisht për të arritur qëllimet e theksuara në këtë statut.
6. FSHN e ka selinë e saj qendrore në adresën Parku Olimpik-Tiranë.
7. FSHN është themeluar me afat të papërcaktuar.

Neni 2

Flamuri, stema, logo dhe vula

1. Flamuri, stema, logo dhe vula janë simbolet e FSHN-së
 - a. Flamuri i FSHN-së përbëhet nga sfondi i bardhe me logon e federates ne mes. Logo eshte e rrethuar ne pjesen e siperme “Federata Shqiptare e Notit” dhe ne pjesen e poshtme “ Albanian Swimming Federation”
 - b. Stema eshte ne forme vezake, ne mes gjendet logo e federates, siper shkruhet “Federata Shqiptare e Notit”, ne pjesen e poshtme viti i themelimit 1931
 - c. Logo eshte konfigurimi i nje notari duke notuar
 - d. Vula eshte ne forme rrethore, me stemen e shqiponjes me dy krere, dhe shkrimin rreth e rrotull” Federata Shqiptare e Notit Tirane

Prodhimi, administrimi dhe asgjесimi i vulës zyrtare të FSHN-së bëhet sipas kuadrit ligjor në fuqi për administrimin e vulave dhe dokumentacionit zyrtar. Vula zyrtare e FSHN prodhohet, mbahet, ruhet dhe administrohet nga Presidenti i FSHN-se.

Neni 3

Qëllimi, fusha e veprimtarisë dhe objektivat

1. FSHN është themeluar me qëllim të zhvillimit te aktiviteteve te sportit te ujit ne disiplina te tilla si not, vaterpol, maratone, not i sinkronizuar, hedhje nga trampolini dhe kategoriae masters (veteranet).
2. FSHN , në përputhje me legjislacionin në fuqi, ka këto objektiva:
 - a. Të zhvillojë, promovojë, kontrollojë dhe rregullojë aktivitetin sportiv në sportin e notit e të gjitha disiplinave ujore te permendura ne nenin 3 pika 1, grup-moshave, gjinitë dhe racave në nivel kombëtar si dhe përfaqësimin në nivel ndërkombëtar, duke u përpjekur për krijimin e kushteve optimale për ushtrimin e disiplinave te ujit. Aktivitetet sportive përcaktohen në kalendarët respektive dhe miratohen në Asamblenë e Përgjithshme. Kufijtë e moshave respektive përcaktohen dhe disiplinohen në Rregulloren e Brendshme të FSHN, bazuar ne rregulloret e LEN (European Aquatics), World Aquatics, COMEN.
 - b. Të ndihmojë në rritjen dhe zhvillimin e marrëdhënieve profesionale midis anëtarëve të FSHN, si dhe të mbrojë të drejtat e anëtarëve të saj.

- c. Të kujdeset për zgjidhjen e problemeve tekniko-organizative, sportive, duke u mbështetur në Statut, Rregulloret e saj, Legjislacioni në Fuqi, si dhe aktet ligjore ndërkombëtare të veprimtarisë në sportin e notit dhe të disiplinave të tjera të ujit
- d. Të marrë masa për ndalimin e diskriminimit në veprimtaritë sportive për shkaqe, si bindjet politike a fetare, raca, etnia, gjuha, gjinia, orientimi seksual, gjendja ekonomike ose shoqërore.
- e. Të përdorë eksperiencën e saj për të ndihmuar rritjen dhe zhvillimin e marrëdhënieve miqësore midis anëtarëve të FSHN, duke inkurajuar frymën e tolerancës, të mirëkuptimit dhe lojës së drejtë (Fair Play) në të gjitha nivelet e ndeshjeve dhe garave
- f. Të organizojë kampionatin kombëtar open dhe të shpallë “Kampionin Kombëtar” dhe “Ekipin Kampion Kombëtar” në sportin e notit dhe disiplinat përkatëse.
- g. Të organizojë Kupën e Shqipërisë dhe të shpallë “fituesin e Kupës së Shqipërisë” në sportin e notit dhe disiplinat përkatëse dhe të organizojë gara kombëtare të tjera nën autoritetin e FSHN.
- h. Të organizojë, administrojë dhe kontrollojë disiplinat në sportin e notit në Republikën e Shqipërisë.
- i. Të mbrojë interesat e përbashkëta të shoqatave të notit dhe të anëtarëve të saj.
- j. Të aderojë në Komitetin Olimpik Kombëtar Shqiptar.
- k. Të përfaqësojë Republikën e Shqipërisë në federatat ndërkombëtare përkatëse të notit dhe disiplinat e tij.
- l. Të organizojë ekipet kombëtare të të gjitha kategorive dhe të marrë pjesë në veprimtaritë sportive ndërkombëtare ose të autorizojë pjesëmarrjen e anëtarëve të saj në këto veprimtari.
- m. Të organizojë në Republikën e Shqipërisë veprimtari sportive kombëtare dhe ndërkombëtare pas marrjes së miratimit të Ministrisë përgjegjëse për sportin dhe të japë leje për organizimin e tyre nga anëtarët e vet.
- n. Të licensojë trajnerë dhe gjyqtarë për sportin e notit dhe të disiplinat e tij.
- o. Të koordinojë dhe japë pëlqimin për kryerjen e veprimtarive dhe garave sportive për anëtarët e saj, kur këto janë në përputhje me statutin e FSHN.
- p. Të autorizojë përdorimin e simboleve të federatës nga anëtarët e saj përmes parashikimeve në rregulloren e brendshme të FSHN.

KREU II ANËTARËSIA NË FSHN

Neni 4 Anëtarësimi

1. Anëtarët e FSHN krijohen në një nga format ligjore të parashikuara në ligjin për sportin.
2. Anëtarët e FSHN mund të jenë klube sportive, shoqata sportive apo shoqëri sportive, të cilat paraqesin dokumentat themeluese të tyre si dhe dokumentate tjerë të përcaktuar nga FSHN.
3. Pas regjistrimit në gjykatë si person juridik, klubi sportiv, shoqëria sportive ose shoqata sportive mund të kërkojnë të drejtën e anëtarësisë pranë FSHN.
4. Çdo kërkesë për t'u anëtarësuar në FSHN duhet të depozitohet me shkrim në sekretarinë e FSHN
5. Procedura për marrjen e të drejtës së anëtarit të FSHN si dhe kriteret për të fituar këtë të drejtë përcaktohen në rregulloren për anëtarësim që miratohet nga Këshilli Drejtues. Per te patur te drejten e kerkimit per t'u anetaresuar ne FSHN, subjektet kerkues duhet te kene nje statut te miratuar, te jene te regjistruar si te tilla ne gjykate dhe te paraqesin nje kerkese per anetaresim.
6. Këshilli Drejtues i FSHN i jep kërkesit të drejtën e të qëniti anëtar provizor i FSHN, deri në mbledhjen e Asamblesë së Përgjithshme të radhës.
7. Asambleja e Përgjithshme e FSHN vendos mbi anëtarësinë e një anëtari.
8. Vendimi i Asamblesë së Përgjithshme duhet të jetë i arsyetuar. Kundër vendimit të Asamblese nese ka te tille, mund të paraqitet ankim pranë Këshillit të Arbitrazhit Sportiv (KAS).
9. Për t'u anëtarësuar në FSHN, secili i interesuar duhet të pranojë Statutin dhe të angazhohet për përmbushjen e qëllimeve të organizatës.
10. Anëtarët e regjistruar të FSHN janë të detyruar të kontribuojnë për FSHN nëpërmjet pagimit të kuotizacioneve të përcaktuara nga Asambleja e Përgjithshme.
11. Selia e një anëtari të FSHN duhet të jetë në territorin shqiptar.
12. Anëtarët e FSHN kanë të drejtë të marrin dijeni për të gjithë vendimet dhe veprimtaritë sportive të FSHN. Njoftimi në këto raste kryhet nëpërmjet dërgimit të një njoftimi nga sekretariati i FSHN. Si njoftim zyrtar njihet posta elektronike si edhe rruga postare.

Neni 5 Të drejtat dhe detyrat e anëtarëve

1. Anëtari i FSHN ka të drejtë:
 - a. Të pajiset me kartën e anëtarësimi;

- b. Të pajiset me Statutin dhe Rregulloret e FSHN;
 - c. Të përfaqësohet me të drejta vote në Asamblesë e Përgjithshme me një përfaqësues të zgjedhur prej tij;
 - d. Të informohet me veprimtarinë e FSHN si dhe me vendimet e Komitetit Drejtues të FSHN;
 - e. Të pajiset falas me botimet e ndryshme që mund të bëjë FSHN;
 - f. Të marrë pjesë në aktivitete zyrtare e miqësore, Kombëtare e ndërkombëtare që organizon FSHN.
 - g. Të njihet më parë me programin e mbledhjes së Asamblesë së Përgjithshme dhe dokumentacionin përkatës dhe të ftohet në takim në kohën e përcaktuar.
2. Anëtari provizor ka të drejtë të përfitojë të drejtat e parashikuar në germa b., d.,g., të pikës 1. të këtij neni, por nuk ka asnjë të drejtë tjetër, vecanerisht të drejtën e votes deri në anetaresimin zyrtar të tij.
3. Anëtari i FSHN ka këto detyrime:
- a. Të pranojë dhe të zbatojë Statutin, direktivat, vendimet dhe Rregulloret e FSHN dhe organizmave ndërkombëtare.
 - b. Të paguajë detyrimet financiare ndaj FSHN.
 - c. T'i komunikojë FSHN çdo ndryshim në Statutet dhe Rregulloret e anëtarit, sidhe të depozitojë një listë të personave ose zyrtarëve me të drejtë firme që përfaqesojnë këte anetar në lidhje me FSHN dhe të tretet.
 - d. Të zgjedhë organet e saj drejtuese, ekzekutive dhe nëse e gjykon të arsyeshme dhe organin e saj disiplinor.
 - e. Të njohë parimet e ndershmërisë, fair play-it, integritetit dhe sjelljes korrekte sportive.
 - f. Të njohë të gjitha detyrimet e tjera që dalin nga Statuti, rregulloret, direktivat dhe vendimet e FSHN.
 - g. Të mos lejojë asnjë person të marrë pjesë në asnjë veprimtari sportive të Notit, pa u anëtarësuar më parë pranë FSHN.
4. Anëtarët e FSHN duhet të integrojnë në statutet e tyre detyrimet e lartpërmendura. Shkelja e detyrimeve të lartpërmendura nga ndonjë anëtar mund të sjellë sanksione të parashikuara në këtë Statut.

Neni 6

Pezullimi, përjashtimi dhe dorëheqja e anëtarit

1. Pezullimi apo përjashtimi i anëtarit bëhet me vendim të arsyetuar të Asamblesë së Përgjithshme.

2. Pezullimi i anëtarit të FSHN ndodh në rastin e konstatimit të shkeljeve të Statutit, Rregulloreve, direktivave dhe vendimeve të FSHN.
 3. Rastet dhe afatet e pezullimit janë:
 - a. Për shkelje të rregulloreve (deri ne 1 vit)
 - b. Për shkelje të vendimeve (deri ne 1 vit)
 - c. Për shkelje të përcaktimeve statutore (1 vit)
 - d. Për mospagim të kuotizacionit (1 vit)
 - e. Per shkelje disiplinore ne kundërshtim me rregullat e etikës, të kryera nga ekipi, sportistët si dhe familjarët e tyre që aderojnë ose jo në ekipet përkatëse (deri ne 1 vit).
 - f. Per mospjemarrje ne aktivitetet sportive zyrtare te FSHN, parashikuar ne kalendarin sportiv vjetor.(pa afat, deri ne momentin e riaktivizimit sportiv sipas kalendarit sportiv vjetor dhe miratimit nga FSHN)
 4. Statusi i anëtarit mbaron me dorëheqjen ose përjashtimin e anëtarit.
 5. Përjashtimi i anëtarit ndodh në rast të mospagimit të kuotizacionit vjetor për dy vite rradhazi dhe për shkelje të tjera të cilat vlerësohen nga Asambleja rast pas rasti. Përjashtimi i anëtarit nuk e liron atë nga detyrimet e veta financiare të papërbushura kundrejt FSHN.
 6. Dorëheqja e anëtarit bëhet me kërkesë me shkrim, ku zbardhet vendimi i Asamblese së Përgjithshme të shoqatës të nënshkruar nga anëtarët e saj.
- Akti i pranimit të dorëheqjes ose përjashtimit del brenda 2 javëve nga kërkesa për dorëheqje apo përjashtim. Pranimi i dorëheqjes dhe i përjashtimit nuk e liron anëtarin nga detyrimet e papërbushura kundrejt FSHN.

KREU III ORGANIZIMI

Neni 7

Organet dhe autoritetet drejtuese të FSHN

1. Organet e FSHN-së, janë :
 - a. Asambleja e Përgjithshme është organi më i lartë vendimmarrës.
 - b. Komiteti Drejtues është organ ekzekutiv i Federatës.
 - c. Presidenti i FSHN është autoritet drejtues i FSHN.
 - d. Sekretariati i përgjithshëm është organ administrativ.
2. Pranë FSHN-së funksionojnë komisione për përmbushjen e qëllimit dhe funksionimit të saj.
3. Komisionet janë :
 - A) Komisioni finances

- B) Komisioni teknik
 - C) Komisioni apelit
 - D) Komisioni disiplines
 - E) Kolegjiumi Gjyqtareve
 - F) Komisioni sportistevë
4. Presidenti i FSHN është përfaqësuesi zyrtar i saj, mbajtësi i vules zyrtare të Federatës në marrëdhëniet me FSHN me organet e veta drejtuese, apomë saj dhe subjekteve të treta private apo shtetërore.

Neni 8

Asambleja e Përgjithshme

1. Asambleja e Përgjithshme është organi më i lartë vendimmarrës i FSHN dhe përfaqëson autoritetin më të lartë të saj.
2. Asambleja e Përgjithshme përbëhet nga tërësia e të gjithë anëtarëve e saj, të cilët përfaqësohen me 1 (një) votë.
3. Anëtarët e pezulluar nuk kanë të drejtë vote
4. Asambleja e Përgjithshme ka përgjegjësinë më të lartë për përcaktimin e fushës dhe veprimtarisë si dhe çështjet financiare të FSHN.

Neni 9

Kompetencat e Asamblesë së Përgjithshme

1. Asambleja e Përgjithshme ka këto kompetenca:
 - a. Miraton ndryshime të Statutit të FSHN;
 - b. Mbikqyr dhe kontrollon përmbushjen e vendimeve, rregulloreve, direktivave të miratuara prej saj;
 - c. Miraton buxhetin, raportet financiare dhe të punës të Federatës.
 - d. Asambleja zgjedh Presidentin e Federatës si dhe anëtarët e Komitetit Drejtues me votim të fshehtë.
 - e. Asambleja miraton rregulloren për funksionimin e Komitetit Drejtues dhe organit administrativ.
 - f. Miraton propozimet e anëtarëve për dhënie të titujve të nderit brenda juridiksionit të FSHN.
 - g. Miraton pranimin a anëtarëve, pezullimin, përjashtimin apo dorëheqjen e një anëtari sipas parashikimit në këtë Statut.
 - h. Deklaron shkrirjen e Federatës dhe likuidimin e veprimeve të saj financiare.
 - i. Miraton Kalendarin e aktiviteteve të propozuara nga Komiteti Drejtues.

2. Kompetencat e Asamblesë së Përgjithshme, të parashikuara në nenin 20 të ligjit nr 8788, datë 7.5.2001 “Për organizatat jofitimprurëse” nuk mund të delegohen në organet tjera.
3. Asambleja e përgjithshme miraton rregulloren e disiplinës, kodin e etikës, rregullore për organizimin e zgjedhjeve dhe votimit dhe rregullore të tjera të nevojshme për ecurinë dhe realizimin e qëllimit të FSHN.

Neni 10

Mbledhjet e Asamblesë së Përgjithshme

1. Asambleja mblidhet në mbledhje të zakonshme nga Presidenti jo më pak se njëherë në vit, por ajo mund të mblidhet edhe në mbledhje të jashtëzakonshme kur thirret nga:
 - a. Presidenti i FSHN;
 - b. Kur kërkohet nga 1/3 e të gjithë anëtarëve të Asamblesë, vetem për rastet e parashikuara nga piken 2 të këtij neni; Kërkesa i drejtohet Presidentit të Asamblesë, i cili ka detyrimin për thirrjen dhe organizimin e mbledhjes njoftimin me shkrim të të gjithë anëtarëve duke përfshirë datën dhe vendin e mbajtjes së mbledhjes, së bashku me rendin e ditës. Noftimi për mbledhjen dot’u shpërndahet të gjithë anëtarëve së paku 7 (shtatë) ditë para ditës së mbajtjes së mbledhjes.
2. Asambleja e Jashtëzakonshme thirret në rastet kur:
 - a) Jane konstatuar shkelje financiare të kryera;
 - b) Kur shkelet statuti ose Ligji “Për Sportet” i ndryshuar.
3. Mbledhja e zakonshme e FSHN thirret nga Komiteti Drejtues i cili përcakton edhe rendin e ditës. Njoftimi u dërgohet anëtarëve 30 ditë para zhvillimit të mbledhjes ndërsa rendi i ditës, raportet e aktiviteteve, buxheti, llogaritë dhe çdo dokument tjetër duhet t’u dërgohet anëtarëve 10-ditë përpara datës së zhvillimit të saj.
4. Çdo anëtar ka të drejtë të propozojë përfshirjen në rendin e ditës të mbledhjes së zakonshme të një çështjeje përmes një kërkesë e cila duhet të paraqitet tek Komiteti Drejtues të paktën 20 ditë përpara mbledhjes, Komiteti Drejtues, shqyrton propozimin dhe në rast se e pranon atë duhet të t’u dërgojë anëtarëve brenda 10ditë përpara datës së mbledhjes së Asamblesë, rendin e ditës të ndryshuar.
5. Për mbajtjen e mbledhjes së zakonshme dhe të jashtëzakonshme është e nevojshme pjesëmarrja e më shumë se gjysmës së anëtarëve. (50%+1)
6. Vendimet në Asamblesë së Përgjithshme do të merren me shumicën e anëtarëve prezent.

7. Në mbledhjet e Asamblesë duhet të jene të pranishem Komiteti Drejtues, sekretari përgjithshem (pa të drejta vote) dhe mund të ftohen të marrin pjesë patë drejtë vote, anëtarët e nderit të miratuar nga Asambleja e Përgjithshme, përfaqësues të Ministrisë përgjegjës për sportin apo të Komitetit Olimpik Shqiptar. Të ftuarit mund të diskutojnë pas lejes së dhënë nga Presidenti i Asamblesë.
8. Çdo vendim i marrë nga Asambleja e Përgjithshme mund të ndryshohet, shfuqizohet vetëm me vendim të Asamblesë së Përgjithshme.
9. Asnjë anëtar i Asamblesë së Përgjithshme nuk i lejohet të marrë pjesë në diskutim apo në marrjen e vendimit për çështje kur ai është në kushtet e konfliktit të interesit.
10. Asambleja e Përgjithshme nuk duhet të marrë vendime për çështje që nuk janë parashikuar në rendin e ditës.
11. Mbledhjet e Asamblesë së Përgjithshme drejtohen nga Presidenti dhe në mungesë të tij nga zv. Presidenti. Në rast të mungesës së Presidentit dhe zëvendës-presidentit, drejtohet nga anëtari i Komitetit Drejtues me moshën më të madhe.

Neni 11

Përfaqësimi i anëtarëve në Asamblesë e Përgjithshme

1. Çdo anëtar i FSHN përfaqësohet në Asamblesë e Përgjithshme me një përfaqësues, i zgjedhur në Asamblesë e Përgjithshme të shoqatës, klubit, apo shoqërisë sportive. Për këtë qëllim çdo klub, shoqëri sportive apo shoqate sportive, çdo fillim viti, duhet të informojë FSHN me listën e anëtarëve të saj, nga ku do të zgjidhet edhe përfaqësuesi në Asamblesë e Përgjithshme të FSHN.
2. Çdo anëtar dërgon në FSHN, në rrugë zyrtare, dokumentacionin e përfaqësuesit të tij të zgjedhur. Dokumentacioni përmban autorizimin e anëtarit me emrin e përfaqësuesit të tij të zgjedhur shoqëruar me vendimin përkatës të Asamblesë së Anëtarit. Ky dokumentacion dërgohet pranë Sekretarit të Përgjithshëm, jo më vonë se 20 ditë përpara zhvillimit të mbledhjes së Asamblesë.
3. Ky përfaqësues ka të drejtën e votës në mbledhjet e Asamblesë së Përgjithshme.
4. Në takimet e Asamblesë së Përgjithshme, përfaqësuesi i çdo anëtarit duhet të disponojë një dokument ligjor të identifikimit (kartë identiteti/ pasaportë).
5. E drejta e votës nuk mund t'i delegohet një anëtarit tjetër.
6. Votimi me prokurë nuk lejohet.

Neni 12

Zgjedhjet

1. Zgjedhjet në FSHN bëhen me votim të fshehtë. Ato janë periodike në cdo katër vjet. Datën e zgjedhjeve e përcakton Presidenti i Federates. Zgjedhjet mund të shtyhen maksimumi nga gjashtë deri në dymbëdhjetë muaj në kushtet e ekzistencës së problemeve teknike në Federatë, të tilla që objektivist e bëjnë të pamundur mbledhjen zgjedhore
2. Presidenti dhe anëtarët e Këshillit drejtues zgjidhen me votim të fshehtë.
3. Cdo anëtar i FSHN ka të drejtën të propozojë 1 kandidat për njërin nga dy pozicionet (për pozicionin e Presidentit ose për pozicionin e anëtarit të Komitetit Drejtues).
4. Të drejtën për të kandiduar për postin e Presidentit e ka cdo anëtar i Asamblesë së Përgjithshme, përveç atyre që kanë konflikt interesi lidhur me veprimtarinë e kryer brenda Federates.
5. Zgjedhja e Presidentit dhe anëtarëve të Komitetit Drejtues është e pakufizuar nga numri i mandateve të mëparshme.
6. Çdo kandidat ka të drejtën të organizojë dhe zhvillojë aktivitete për paraqitjen e programit të tij.
7. Presidenti i Asamblesë është njëkohësisht edhe President i Federatës. Kandidati për President dhe anëtar të Komitetit Drejtues duhet të përmbushë këto kritere:
 - a. Të jetë shtetas shqiptar, me banim në Shqipëri;
 - b. Të ketë arsim të lartë (duke filluar nga shkalla studimit bachelor);
 - c. Të ketë figurë të pastër morale;
 - d. Nuk duhet të jetë denuar me vendim gjyqësor të formës së prera për kryerjen e një veprë penale, sipas parashikimeve të legjislacionit në fuqi.
 - e. Të mos jetë person nen hetim;
 - f. Të mos jetë në kushtet e konfliktit të interesave me postin e Presidentit;
 - g. Moshë e Presidentit që do të kandidojë të jete deri 75 vjeç.
 - h. Të ketë kontribuar mundësisht në fushën e sportit si sportist, trener, gjyqtar, gazetar sportiv apo donator (financues)
8. Të drejtën për të kandiduar në postin e presidentit e kanë anëtarët e Asamblesë që përmbushin kriteret e përcaktuara në pikën 4 dhe 7 të këtij neni.
9. Në raundin e parë, Presidenti ka nevojë për 2/3 e votave të vlefshme të të gjithë anëtarëve pjesëmarrës. Në rastet kur asnjë nga kandidatët nuk arrin këtë shumicë, bëhet një raund i dytë zgjedhës midis dy kandidatëve që kanë marrë më shumë vota në raundin e parë. Në raundin e dytë, kandidati që merr 50 +1 të votave të pjesëmarrësve në votim, zgjidhet President. Në rastet e votave të barabarta, votimi do të përsëritet. Nëqoftëse edhe votimi i dytë përfundon me rezultat të barabartë, vendimi merret nëpërmjet hedhjes së shortit nga Komisioni i numërimit.

10. Kandidatë për anëtarë të Komitetit Drejtues, zgjidhen nga lista e personave që janë propozuar për anëtarë të këtij Komiteti, të cilët kanë marrë numrin më të madh të votave të gjithë anëtarëve.
11. Emrat e kandidatëve për president dhe anetare të komitetit drejtues, bashkë me CV e tyre duhet të dërgohen nepermjet postes elektronike ose rruges postare nga anëtarët e FSHN, në Sekretariatit e Përgjithshëm të FSHN-së, 20 dite para zhvillimit të Asamblese Zgjedhore. Cdo paraqitje jashtë këtij afati e dokumentacionit të kërkuar, do të konsiderohet e pavlefshme dhe emri i propozuar është automatikisht i skualifikuar. Sekretariati i Përgjithshëm verifikon kandidaturat dhe ia paraqet rezultatet Komitetit Drejtues për miratim. Lista e aprovuar e kandidatëve, të cilët plotësojnë kushtet, i paraqitet përfaqësuesve të anëtarëve së bashku me rendin e ditës së Asamblesë. Për këtë veprimtari, Komiteti Drejtues duhet të ngrejë një komision të posaçëm për seleksionimin e kandidaturave, sipas kriterëve të përcaktuara në këtë Statut.
12. Kandidatët për anëtarë të Komitetit Drejtues duhet të përmbushin kriteret e përcaktuara në pikën 7 të këtij neni.
13. Një anëtar i FSHN. nuk mund të propozojë më shumë se një kandidat për anëtar të Komitetit Drejtues.

Neni 13 **Komitet Drejtues**

1. Komiteti Drejtues është organi ekzekutiv i FSHN.
2. Ai përbëhet nga 5-anëtarë, ku 30% të jete femra, me këtë strukturë: Presidenti dhe 4-anëtarë.
3. Anetaret e Komitetit Drejtues duhet të përmbushin keto kriteret:
 - a. Të ketë arsim të lartë (duke filluar nga shkalla studimit bachelor);
 - b. Të ketë figurë të pastër morale;
 - c. Nuk duhet të jete denuar me vendim gjyqësor të formes se prere për kryerjen e një vepre penale, sipas parashikimeve të legjislacionit në fuqi.
 - d. Të mos jetë person nën hetim;
4. Komiteti Drejtues ka këto kompetenca:
 - a. Menaxhon dhe drejton punët e FSHN në përputhje me Statutin dhe siguron zbatimin e tij.
 - b. Emëron dhe shkarkon Sekretarin e Përgjithshëm me propozim të Presidentit.
 - c. Të zgjedhë midis anëtarëve të tij zëvendës presidentin.
 - d. Të rishikojë pasqyrën e llogarive dhe të hartojë buxhetet.
 - e. Të hartojë raportin për aktivitetet.
 - f. Të emërojë, të pezullojë ose të shkarkojë anëtarët e Komisioneve të përhershëm

- ose të përkohshme.
- g. Të hartojë rregulloret dhe t'i paraqesë ato për miratim në Asamblenë e Përgjithshme.
 - h. Per raste urgjente Komiteti Drejtues mund të japë pezullim provizor për të gjithë anëtarët e FSHN (sportiste, trajnere, ekipe/shoqata, gjyqtare), deri në Asamblenë e radhës, e cila do të shprehet me shkrim për një vendim të Komitetit Drejtues.
5. Anëtarët e Komitetit Drejtues mund të shkarkohen para përfundimit të mandatit me propozim të Presidentit dhe me miratim të Komitetit Drejtues të FSHN, vendim i cili do t'i paraqitet Asamblese në mbledhjen me të afert.
 6. Në rast të përfundimit të parakohshëm të mandatit të anëtarit të Komitetit Drejtues, Asambleja e Përgjithshme duhet të zgjedhë anëtarin pasardhës për të ushtruar funksionet për kohën e mbetur.
 7. Vendimet në Komitetin Drejtues merren me shumicë votash të anëtarëve prezent. Për fillimin e mbledhjes së Komitetit Drejtues duhet të jenë present 50%+1. Vota e Presidentit të FSHN është determinante kur kemi barazi votash në Komitetin Drejtues.
 8. Komiteti Drejtues mund të vendosë t'i drejtohet për çfarëdo çështje Asamblesë së Përgjithshme për marrje të vendimit.
 9. Asnjë anëtar i Komitetit Drejtues nuk i lejohet të marrë pjesë në diskutim apo në marrjen e vendimit për çështje ku ai ka interes direkt apo indirekt ekonomik, apo qëka lidhje direkte apo indirekte me veprimtarinë e kryer prej tij brenda FSHN.

Neni 14 **Sekretariati i Përgjithshëm**

1. Sekretariati i përgjithshëm drejtohet nga sekretari i përgjithshëm i cili propozohet nga Presidenti i FSHN dhe emërohet nga Këshilli drejtues, pas propozimit të bere.
2. Sekretari i Përgjithshëm duhet të përmbushë këto kritere:
 - Të ketë arsim të lartë (duke filluar nga shkalla studimit bachelor);
 - Të ketë figurë të pastër morale;
 - Nuk duhet të jetë denuar me vendim gjyqësor të formes së prere për kryerjen e një veprë penale, sipas parashikimeve të legjislacionit në fuqi.
 - Të mos jetë person nën hetim.
3. Struktura e sekretariatit të përgjithshëm dhe funksionimi i tij përcaktohen në rregulloren e hartuar e miratuar nga këshilli drejtues.

KREU IV FINANCA

Neni 15 Periudha financiare

Periudha financiare për Federatën do të jetë viti kalendarik.

Neni 16 Burimet financiare, sponsorizimet dhe reklamimet

1. Të ardhurat e FSHN sigurohen nga:
 - a. Fonde të dhëna nga Buxheti i Shtetit, në formë transferte, të parashikuara në Buxhetin e Shtetit, si dhe burime të tjera të ligjshme. Mënyra e përdorimit të këtij fondi përcaktohet me udhëzim të përbashkët të Ministrit të Financave dhe të Ministrit përgjegjës për Sportin. Ministria përgjegjëse për Sportin mbikëqyr dhe kontrollon vetëm administrimin e transfertës së Buxhetit të Shtetit në të gjitha organizatat sportive që kanë përfituar nga fondet publike; Te ardhura të tjera të cilat janë të pavarura nga kontrolli dhe administrimi i përcaktuar në pikën 1.a të këtij neni të cilat administrohen vetëm nga Federata janë:
 - b. Regjistrimet vjetore të anëtarëve;
 - c. Të ardhurat e krijuara nga marketingu i të drejtave që gëzon FSHN
 - d. Nga sponsorizimet, donacionet, dhurimet, financimet nga shteti dhe burime të tjera të lejuara;
 - e. Nga liçensimi i trenerëve, sportistëve, gjyqtarëve, specialistëve, amatorëve, etj.;
 - f. Nga kuotat e anëtarësimit në FSHN.
2. Klubet sportive ose sportistët e FSHN, me miratim paraprak të Federatës, nëpërputhje edhe me rregulloret e FSHN, kanë të drejtë të vendosin në uniformat që përdorin gjatë zhvillimit të veprimtarisë sportive emrin e shoqërisë sponsorizuese, të shoqërisë sportive ose klubit sportiv në përputhje me kushtet e përcaktuara në kontratën e sponsorizimit ndërmjet klubit, FSHN ose sportistëve dhe sponsorizuesit. Kontratat hartohen në përputhje me Kodin Civil të Republikës së Shqipërisë dhe sipas standardeve dhe rregulloreve ndërkombëtare. Madhësia dhe forma e mbishkrimeve duhet të jenë në përputhje me normat e rregullores së federatës përkatëse sportive dhe me aktet ligjore në fuqi.
3. Organizatorët e veprimtarive sportive gëzojnë të drejtën të përdorin sipërfaqet e dukshme të mjediseve sportive, ku ata zhvillojnë veprimtarinë sportive, për qëllime reklamimi ose sponsorizimi me personat fizikë apo juridikë, vendas apo të huaj, në bazë të marrëveshjeve kontraktuese të lidhura me to.

KREU V
SPORTISTI, KATEGORITË E SPORTISTËVE, TRAJNERI

Neni 17
Sportisti

1. Sportisti ka të drejtë ta zgjedhë vetë shoqatën sportive, shoqërinë sportive, klubin sportiv ku dëshiron të anëtarësohet dhe ta ndryshojë atë në përputhje me statutet e tyre dhe rregulloret e përcaktuara nga FSHN.
2. Pjesëmarrja e sportistit në këto organizata bëhet sipas procedurave të përcaktuara në statut, rregullore dhe në legjislacionin që rregullon marrëdhëniet midis paleve . Sportisti është i detyruar të zbatojë të gjitha detyrimet që rrjedhin nga kontrata me shoqatën sportive, shoqerine sportive apo klubin sportiv.
3. Transferimi i sportistit të FSHN nga një klub sportiv në një tjetër, brenda ose jashtë vendit, bëhet në përputhje me rregulloret e veprimtarive sportive të miratuara nga FSHN dhe nga Federatat Ndërkombëtare World Aquatics, LEN(European Aquatics), COMEN.

Neni 18
Kategoritë e sportistëve

1. Sportistët ndahen në amatorë dhe profesionistë, sipas kushteve të përcaktuara në këtë statut dhe në rregulloret e FSHN
2. Sportistë amatorë të FSHN janë ata sportistë, që praktikojnë sportin e Notit dhe nuk kanë ndonjë kontratë të lidhur me klubin sportiv apo shoqatën sportive ku janë regjistruar.
3. Sportistët profesionistë të notit janë ata persona që praktikojnë sportin e notit si një profesion dhe fitojnë të ardhura në bazë të nënshkrimit të kontratës me shoqatat, shoqëritë apo klubet sportive në të cilat ata janë anëtarë.

Neni 19
Statusi i sportistit të nivelit të lartë
(ndryshuar me ligjin nr. 105/2020, datë 29.7.2020)

1. Sportistët e FSHN të cilët përfitojnë statusin e nivelit të lartë në përputhje me Ligjin për Sportin, klasifikohen sipas rezultateve të larta sportive në veprimtaritë ndërkombëtare zyrtare:

- a) “rekord olimpik”, “rekord botëror”, “rekord european”, “rekord mesdhetar”, “rekord ballkanik”, “vendi i parë deri në të tetin në Lojërat Olimpike”, “vendi i parë deri në të tetin në kampionate botërore” dhe “vendi i parë deri në të gjashtin në kampionate europiane”, përfitojnë trajtimin, shpërblimin dhe integrimin në sistemin arsimor me drejtim sportiv, sigurisë kombëtare dhe mbrojtjes, punësimin në strukturat e Ministrisë së Mbrojtjes dhe Ministrisë së Brendshme.
- b) “vendi i parë deri në vendin e tretë në Lojërat Mesdhetare” dhe “vendi i parë në “Kampionatin Ballkanik””, përfitojnë trajtimin, shpërblimin, integrimin në sistemin

arsimor me drejtim sportiv, sigurisë kombëtare dhe mbrojtjes.

2. Institucionet e arsimit të lartë publik, që ofrojnë programe studimi me drejtim sportiv, siguri kombëtare dhe mbrojtje, sigurojnë kryerjen e studimeve pa konkurs dhe sipas një plani individual për sportistët, të cilët plotësojnë kriteret e përfitimit të statusit të sportistit të nivelit të lartë sipas pikës 1 të këtij neni.

3. Institucionet e arsimit të lartë jopublik, që ofrojnë programe studimi me drejtim sportiv, sigurojnë ndjekjen e studimeve sipas një plani individual për sportistët që përfitojnë statusin e sportistit të nivelit të lartë sipas pikës 1 të këtij neni.

4. Në veprimtari kombëtare zyrtare:

a) sportisti i cili thyen rekordin kombëtar dhe vendi i parë në kampionatin kombëtar për të rritur, të përcaktuara në rregulloret e FSHN, përfitojnë trajtimin dhe shpërblimin nga fondet e njësisive të qeverisjes vendore;

5. Kriteret, mënyra e shpërblimit dhe trajtimit të sportistëve, që përfitojnë statusin e nivelit të lartë dhe trajnerëve të tyre, përcaktohen me vendim të Këshillit të Ministrave.

Neni 20 Trajneri

1. Klubet sportive, shoqatat dhe shoqëritë sportive anëtare të FSHN duhet të punësojnë trajnerë të licencuar nga FSHN dhe të nënshkruajnë kontratë punësimi, në përputhje me Kodin e Punës të Republikës së Shqipërisë
2. Klubet sportive, shoqatat, shoqëritë sportive dhe FSHN, kanë përgjegjësi për kualifikimin dhe trajnimin e mëtejshëm të trajnerëve në bashkëpunim me institucione përkatëse të fushës.

Neni 21 Detyrimet e sportistit dhe trajnerit

1. Sportisti i FSHN duhet të respektojë rregullat e FSHN dhe të Federatave Ndërkombëtare të Notit, parimet etike të sportit dhe të fair-play-t, kushtet e Konventës Ndërkombëtare të Antidopingut dhe rregulloret e veprimtarisë së FSHN
2. Trajnerët respektojnë rregullat e fair-play-t, parimet e Kodit të Etikës, Konventën Ndërkombëtare të Antidopingut, si dhe rregulloret e FSHN.
3. Nuk lejohet të marrin pjesë në aktivitetet kombëtare dhe nderkombëtare trajneret që nuk plotësojnë kriteret e nenit 20 pika 1 e statutit të FSHN.

KREU VI

INFRASTRUKTURA SPORTIVE

Neni 22

Ndërtimi dhe përdorimi i objekteve sportive

1. Objektet sportive ndërtohen dhe përdoren sipas rregullave teknike, higjieno-shëndetësore në përputhje me legjislacionin në fuqi.

2. Standardet, kontrolli, mbikqyrja e objekteve sportive parashikohen në rregulloren mbi ndërtimin dhe përdorimin e këtyre objekteve.

KREU VII DREJTËSIA SPORTIVE

Neni 23 Shqyrtimi administrativ

1. FSHN krijon organet e gjykimit disiplinor, sipas procedurave të percaktuara në rregulloret e miratuara nga Asambleja Pergjithshme.
2. Organet e gjykimit disiplinor të FSHN shqyrtojnë dhe vendosin masa ndëshkuese ndaj pjesë-marrësve në veprimtaritë, garat sportive, që kryejnë shkelje disiplinore ose teknike, në kundërshtim me rregulloren e veprimtarisë dhe/ose me rregulloren e disiplinës së FSHN.
3. Vendimet e organeve të gjykimit disiplinor të FSHN, mund të ankimohen në Këshillin e Arbitrazhit Sportiv (KAS) brenda 15-ditëve kalendarike nga shpallja e tyre.

Neni 24 Zgjidhja e mosmarrëveshjeve

- 1. FSHN pranon autoritetin e Këshillit të Arbitrazhit Sportiv.**
1. Vendimet e organeve drejtuese të FSHN që bien në kundërshtim me ligjin dhe me këtë Statut, si dhe zgjidhja e mosmarrëveshjeve në fushën e sportit të Notit, ankimohen në Këshillin e Arbitrazhit Sportiv (KAS), organ i ngritur pranë Komitetit Olimpik Shqiptar. Të gjitha organizatat sportive të FSHN dhe çdo sportist apo trajner me titull individual në sportin e notit, kanë të drejtën e ankimit për vendimet e organeve drejtuese dhe mosmarrëveshjet në (KAS).
2. Komiteti Olimpik Kombëtar Shqiptar, FSHN, klubet dhe shoqatat sportive, shoqëritë dhe çdo sportist apo trajner me titull individual në sportin e notit, pranojnë autoritetin e Këshillit të Arbitrazhit Sportiv (KAS). FSHN njeh dhe zbaton vendimet që merr këshilli i Arbitrazhit Sportiv (KAS) për vete dhe për anëtarët e saj.
3. Vendimet e Këshillit të Arbitrazhit Sportiv (KAS) ankimohen vetëm në Gjykatën e Arbitrazhit të Sportit (CAS), në Lozanë të Zvicrës.
4. Asnje vendim tjetër i marre jo nga organet kompetente të KAS dhe CAS ,që ka të beje ose jo me veprimtarine sportive apo organizative apo fushat e tjera të veprimtarise se Federates apo që mund të ndikojë në aktivitetet e saj, nuk do të njihet dhe nuk do të merret parasysh nga FSHN.

KREU VIII
ANTIDOPINGU, KONTROLLI MJEKËSOR NË SPORT DHESIGURIMI
SHËNDETËSOR I SPORTISTËVE

Neni 25
Përdorimi i substancave dhe metodave doping

1. FSHN pranon autoritetin e Organizatës Kombëtare Antidoping për kontrollin e sportistëve, anëtarë të tyre, dhe dënimin e përdoruesve të dopingut
2. Në procesin stërvitor dhe në veprimtaritë sportive të sportit të notit është i ndaluar përdorimi i substancave dhe metodave doping.
3. Lista e substancave dhe metodave doping të ndaluara në Republikën e Shqipërisë është e njëjtë me ato të miratuara nga Agjencia Botërore e Antidopingut.
4. Përdorimi i substancave dhe metodave doping, si dhe nxitja për përdorimin e tyre dënohen sipas normave ndërkombëtare, të pranuar nga FSHN

Neni 26
Dispozita të veçanta në lidhje me dopingun

1. FSHN njih dhe merr përsipër të zbatojë sanksionet mbi Anti-dopingun dhe Feminitetin, konform rregullores së Federatës Ndërkombëtare të Notit në këtë fushë.
2. FSHN njih autoritetin e Organizatës Kombëtare Antidoping në ushtrimin e kontrolleve antidoping me sportistët anëtarë të FSHN.
3. FSHN dhe të gjithë organizatat sportive anëtare të saj, pranojnë masat disiplinore dhe dënimet e dhëna nga Organizata Kombëtare Antidoping dhe Federata Ndërkombëtare e Notit për sportistët anëtarë të FSHN që rezultojnë pozitiv në këto kontrolle.
4. FSHN dhe Organizata Kombëtare Antidoping, si dhe të gjitha organizatat sportive të Notit anëtare të FSHN, janë të detyruara të respektojnë antidopingun sipas përcaktimeve të bëra në dispozitat e Konventës Ndërkombëtare Kundër Dopingut në Sport, 2005, të ratifikuar nga Republika e Shqipërisë me ligjin nr. 9623, datë 16.10.2006, “Për aderimin e Republikës së Shqipërisë në Konventën Ndërkombëtare kundër Dopingut në Sport, 2005”, dhe Konventës Europiane Antidoping të vitit 1989, të ratifikuar nga Republika e Shqipërisë me ligjin nr. 9242, datë 17.6.2004, “Për ratifikimin e Konventës Europiane Antidoping, 1989”.

Neni 27
Kontrolli mjekësor në sport

1. Asnjë sportist nuk mund të anëtarësohet në FSHN dhe të marrë pjesë në veprimtaritë sportive të organizuara prej saj, pa paraqitur vërtetimin mjekësor që e lejon atë të

ushtrrojë sportin e notit. Sportistët e anëtarësuar në FSHN pajisenme kartelë mjekësore vetjake.

2. Kontrolli mjekësor i sportistëve bëhet nga mjekë të licensuar, të paktën një herë në 6-muaj, për matjen e parametrave jetësorë.
3. Kontrolli mjekësor për të gjitha kategoritë e ekipeve kombëtare të notit bëhet nga struktura përgjegjëse e kontrollit mjekësor dhe rehabilitimit pranë Qendrës së Shërbimit të Sportit dhe Përgatitjes së Ekipeve Kombëtare.
4. Organizuesit e veprimtarisë sportive mbajnë përgjegjësi administrative për aktivizimin e sportistëve pa kartelë mjekësore në garat sportive

Neni 28

Sigurimi shëndetësor i sportistëve

1. Organizatat sportive (klube sportive, shoqëri sportive, shoqata sportive) anëtare të FSHN, janë përgjegjëse për sigurimin shëndetësor të sportistëve që marrin pjesë në veprimtaritë sportive të notit.
2. Sigurimi shëndetësor i sportistëve përballon të gjitha shpenzimet për mjekimin e dëmtimeve që mund t'u ndodhin sportistëve gjatë veprimtarisë së tyre sportive.
3. Organizata sportive (klube sportive, shoqëri sportive, shoqata sportive) anëtare të FSHN, që lejojnë pjesëmarrjen në veprimtaritë sportive të sportistëve të pasiguruar nga ana shëndetësore, detyrohet të paguajë të gjitha shpenzimet për rehabilitimin e sportistit në rast dëmtimi në veprimtarinë sportive, në përputhje me legjislacionin shqiptar në fuqi.
4. FSHN është përgjegjëse për sigurimin shëndetësor të sportistëve të ekipeve kombëtare gjatë grumbullimeve stërvitore dhe pjesëmarrjes në veprimtaritë ndërkombëtare të notit.

KREU IX PARANDALIMI

I DHUNËS NË SPORT

Neni 29

Ndalimi i provokimeve dhe i sjelljeve të palejuara

1. Gjatë veprimtarive sportive të FSHN, të të gjitha niveleve ose gjatë transmetimit të tyre në publik ose në mjedise ku ato zhvillohen, ndalohet provokimi ose përpjekja për provokim me karakter politik, shoqëror, racial, fetar a gjinor, që synon nxitjen e urrejtjes e të dhunës ndaj pjesëmarrësve në veprimtarinë sportive dhe/ose ndaj spektatorëve.
2. Gjatë veprimtarive sportive të FSHN, të të gjitha niveleve ose gjatë transmetimit të tyre në publik ose në mjedise ku ato zhvillohen, ndalohen sjelljet e palejuara të mëposhtme:

- a. sulmi fizik ndaj çdo pjesëmarrësi në ngjarjen sportive, qofshin pjesëmarrës të drejtpërdrejtë të veprimtarive sportive apo shikues, ose përleshja fizike mes pjesëmarrësve dhe tifozëve;
 - b. gjuajtja e sendeve në terrenin sportiv të lojës ose në tribunat e tifozëve;
 - c. shfaqja e materialeve propaganduese, me të cilat fyhen ndjenjat kombëtare ose ndjenjat e tjera ose kryejnë provokim me karakter politik, shoqëror, racial, fetar a gjinor;
 - d. ndërmarrja e veprimeve që nxisin urrejtje e që mund të sjellin deri në dhunë apo sulme fizike;
 - e. dëmtimi i mjediseve të sportit, pajisjeve sportive, instalimeve dhe pajisjeve të tjera në mjedisin sportiv;
 - f. veprimet me të cilat pengohet hyrja apo dalja e pjesëmarrësve në mjedisin sportiv, pengimi i zhvillimit të veprimtarisë sportive apo shkaktimi i pasigurisë në mjedisin sportiv për pjesëmarrësit apo personat e tjerë;
 - g. hyrja e paautorizuar në hapësirat e mjedisit sportiv dhe të terrenit sportiv;
 - h. hyrja e paautorizuar në hapësirat zyrtare dhe në kalimet zyrtare të mjedisit sportiv ose në pjesën e tribunës që i caktohet tifozëve të ekipit mik;
 - i. djegia e rekuizitave, shenjave identifikuese të shteteve, klubeve etj., ose esendeve të tjera në mjedisin sportiv;
 - j. përdorimi i maskave ose sendeve të tjera, me qëllim fshehjen e identitetit ose fshehjen e fytyrës;
 - k. trukimi i rezultateve të veprimtarive sportive.
3. Organizatori i veprimtarisë sportive të FSHN është i detyruar të ndërmarrë të gjitha masat dhe veprimet e nevojshme për sigurimin e veprimtarisë sportive dhe, në veçanti, të kujdeset për marrjen e masave parandaluese të shfaqjes së provokimeve e të sjelljeve të tjera të palejuara.
4. FSHN, në veprimtarinë kundër dhunës në Shqipëri, respektojnë dispozitat e Konventës Europiane Kundër Dhunës në Sport ku aderon Republika e Shqipërisë.

Neni 30

Sendet e palejuara në objektet dhe mjediset sportive

1. Ndalohen mbajtja dhe përdorimi në objektet e mjediset sportive të FSHN dhe gjatë zhvillimit të veprimtarive i fishekzjarrëve, flakadanëve, lëndëve piroteknike dhe sendeve të tjera të forta, të rrezikshme për jetën dhe shëndetin e pjesëmarrësve, i armëve të të gjitha llojeve, si edhe përdorimi e tregtimi i pijeve alkoolike.
2. Gjatë veprimtarive sportive të FSHN, personat në cilësinë e përfaqësuesit të FSHN, gjyqtarëve dhe vëzhguesve, janë të paprekshëm.

Neni 31
Ruajtja e rendit dhe e sigurisë publike

1. Organizatori i një veprimtarie sportive të FSHN është i detyruar të njoftojë Policinë e Shtetit me shkrim të paktën 7-ditë kalendrike përpara zhvillimit të saj, me qëllim planifikimin e të gjitha masave të nevojshme të sigurisë për mbarëvajtjen e saj.
2. Në këtë njoftim, organizatorët duhet të përcaktojnë edhe shërbimin privat të sigurisë fizike (SHPSF) të kontraktuar (nese do të zgjedhin një të tilla), për marrjen e masave të sigurisë në mjediset sportive të FSHN
3. Ruajtja e rendit dhe e sigurisë publike në mjediset sportive është detyrë institucionale e organeve të Policisë së Shtetit.
4. Administratorët e objekteve dhe mjediseve sportive, në bashkëpunim me klubet sportive të Notit, nëpërmjet shoqërive private të sigurisë fizike (SHPSF) (nese ka të tilla), duhet të marrin këto masa:
 - a. të kryejnë kontrollin rigoroz të tifozëve në portat e hyrjeve në mjedisin sportiv;
 - b. të kryejnë sigurimin e vendkalimeve publike në mjedisin sportiv;
 - c. të kryejnë drejtimin e spektatorëve tek ulëset në mjedisin sportiv dhe mbajtjen e tyre nën kontroll;
 - d. të kryejnë sigurimin dhe mbrojtjen e sportistëve nga futja e tifozëve në mjedisin sportiv.
3. Administratorët e mjediseve sportive marrin masat për caktimin e një ambienti të përshtatshëm për drejtuesit e njësisë policore për monitorimin e situatës së rendit publik në mjedisin sportiv.

KREU X
DISPOZITA PËRFUNDIMTARE DHE TË FUNDIT

Neni 32
Dispozita të fundit

1. Për çështjet që nuk parashikohen në këtë Statut ose për çështje të forcave madhore do të zgjidhen duke ju referuar dispozitave të Ligjit Nr.79/2017, datë 27.04.2017 “Për Sportin” i ndryshuar, Kodit Civil, ligjit Nr. 8788, datë 07.05.2001 “Për Organizatat Jofitimprurëse” të ndryshuar, ligjit Nr. 80/2021 “Për regjistrimin e Organizatave Jofitimprurëse” të ndryshuar, si dhe akte të tjera ligjore e nënligjore qërregullojnë këtë aktivitet.
2. Çdo ndryshim i Statutit të FSHN, përpara se të regjistrohet në Gjykatën kompetente, miratohet me urdhër të Ministrit përgjegjës për Sportet.

Neni 33
Hyrja në fuqi

Ky Statut i FSHN, hyn në fuqi pas vendimit të gjykatës së rrethit gjyqësor, Tiranë.

Regjistrimi në Gjykatën e Shkallës së Parë të Juridiksionit të Përgjithshëm Tiranë,

më **05/04/2024**.

Suela HAXHIJA
Sekretare Përgjithshme

